

ALAHADY PAKA III - TAONA D2025



« Dia nanatona i Jesoa, nandray ny mofo, sy nanome azy ireo »
(Jo. 21 : 13)»

Ry Kristianina havana, mbola ao anatin'ny Alahady fankalazana ny Paka isika. Isaky ny Alahady dia omen'ny Eglizy lohahevitra iray isika hibanjinantsika ny toetran'i Kristy mba hianarantsika miaina ny toetrany ka hahatonga antsika ho Kristianina, Kristy mpiara-belona amin'olona, ho Mpivahinin'ny Fanantenana isika amin'izao taon-jobily izao. Isika izao no mpamafy ny fiadanana sy fanantenana ary fihavanana fa indrindra amin'izao andro sarotra diavintsika ka nahatonga ny Eveka eto Madagaskara hanokana ny tanindrazantsika sy isika jiaby amin'ny Fo Masin'i Jesoa izao. Mila Fo izao androntsika izao, Fo manahaka ny Fo Masin'i Jesoa ho loharanon'ny famelan-keloka sy famindram-po izay fototry ny fihavanana handrindra indray ny fifandraisana na amin'ny tontolo iainana izay efa tena potika na amin'ny tontolom-piainana izay indrisy anjakan'ny tsy rariny, ny fitiavan-tena, fialonana, fitapitaka, risoriso mitondra mandrakariva amin'ny herisetra sy korontana. Ka ny fomba ho entintsika hiaina an'izany dia

Vakiteny I : Asa 5, 27b-32. 40b-41
Tononkira : Salamo 29
Vakiteny II : Apôk. 5, 11-14
Evanjely : Jo. 21, 1-19

ny vavaka tototafo na sapile izany na sapilen'ny famindram-po ka zary “chapelle portable” isika amin'ny toerana rehetra misy antsika na amin'ny fianakaviana Eglizy kely, na amin'ny Eglizy fiombonana, na amin'ny Eglizy fototra, na amin'ny Eglizy iraka na eny amin'ny toeram-piasana na an-tsekoly na amin'ny toerana maro samihafa hamafazantsika ny fiadanana sy ny fanantenana ary fihavanana. Hafaliana no hanenika ny fiainantsika raha mamafy ny fiadanana isika.

Lalana entintsika mametraka fifandraisana vaovao vokatry ny Paka ny firotsahana mavitrika manatanteraka ny Sinaody faha-7 fijanonana faha-3 satria ny lohahevitra dinihintsika dia mifanojo tanteraka amin'izany rehetra izany : EO V MIFAMPITSIMBINA MIFANASOA MIKATSAKA MANDRAKARIVA NY SOA IOMBONANA.... Mahereza àry isika.

Tamin'ny Alahady lasa dia nibanjina an'i Kristy mpamindra fo isika mba hahatonga antsika koa ho mpamindra fo. Nampianatra antsika i Md Thomas raha nanao ny fiekem-pinoana “Tompoko sy Andriamanitra”, na dia eo aza ny fisalasalana dia fantaro fa i Jesoa nilaza hoe “Sambatra izay mino nefa tsy nahita”. Izany hasambarana izany no entintsika mamafy ny fanantenana sy ny fiadanana eo anivontsika.

Amin'izao Alahady fahatelo izao kosa dia ireo mpianatra miverina amin'ny asan'izy ireo andavanandro izany hoe niverina amin'ny maha-mpanarato azy ireo nefa tsy nahazo na inona na inona ka tonga teo aminy I Jesoa nankahery azy ireo sy naniraka azy ireo hoe “*Alatsaho ao ankavanany sambo kely àry ny haratonareo, fa hahazo ianareo*”. I Jesoa velona tokoa eo anivontsika no banjinintsika androany. Koa amin'ny asa rehetra sahanintsika sy iandraketantsika, miaraha amin'I Jesoa fa velona izy ary manampy antsika hamokatra. Jesoa miara-dàlana amintsika, mihaino antsika sy mampianatra antsika satria velona izy ary mizara ny ainy ho antsika.

Fantatsika ny tantaran'ny mpianatra tany Emaosy, feno fisalasalana teny an-dàlana izy ireo ka rehefa nanomboka nihaino an'I Jesoa izy ireo dia nampianatra I Jesoa. Io fihainoana io dia manambara finoana ao amin'ny Soratra Masina. Nampianarin'i Jesoa ny Soratra Masina izy ireo ka niova ny fomba fijeriny, tsy araka ny fijerin'izao tontolo izao intsony. Nandalina ny finoana ka nosokafan'i Jesoa ny fo amam-panahin'izy ireo fa indrindra rehefa nankalaza ny Eokaristia. Tsy hitany intsony anefa I Jesoa fa ny fon'izy ireo kosa dia nirehidrehitra sy nahafantatra fa velona i Kristy noho ny herin'ny Fanahy masina. Ka ny evanjely androany dia manambara koa fa noho ny herin'ny Fanahy masina dia nahafantantra an'I Kristy izy ireo ka mirehidrehitra ny fony. Tsy firehan-kevitra i Jesoa fa olona velona eo anivontsika izy, olona izay miara-dàlana amintsika isanandro isanandro. Izany ny finoantsika. Tsy Andriamanitra lavitra ny Andriamanitsika fa eo anivontsika.

Jesoa nanaiky ho faty na dia tsy nanota aza ka nandresy ny fahafatesana, velona eo anivontsika ary mizara amintsika izany fahasoavana fa velona ao amintsika izy. Tsy matoatoa izy na angatra na lolo fa olona velona eo anivontsika. Na dia izany aza dia efa voalazany fa tsy

maintsy nijaly izy ary maty nefa nitsangan-ko velona. Izany no làlam-piainantsika raha miombona aminy isika, tsy maintsy mijaly nefa mandresy miaraka aminy. Isika izao no Kristy mpiara-belona ka vavolombelon'izany fahasoavan'I Kristy velona izany ka aoka isika ho mpizara ny vaovao mahafaly sy hiaina ny hafaliana miaraka amin'ireo manodidina antsika.

Ny vakiteny voalohany manambara fa I Piera nisolo vava ireo mpianatra ka nilaza am-pahibemaso ny fototry ny finoana "*kérygme*" izany hoe ny fizarana ny vaovao mahafaly "*I Jesoa zanak'Andriamanitra dia nofantsihana tamin'ny hazo fijaliana tamin'ny andron'I Pilaty, novonoina izy, nijanona tao am-pasana fa nitsangan-ko velona ary izahay ireto no vavolombelon'izany*". Isika koa no vavolombelona amin'izao androntsika izao ka mpamafy ny fanantenana amin'ireo kivy sy ireo feno tebiteby satria entanin'ny Paka izay finoantsika isika. Tsy hoe firehan-kevitra no zaraintsika fa i Kristy velona, Izy no mahatonga antsika ho zanak'Andriamanitra. Ny làlana sy ny foto-pampianarana androany dia ny fibebahana, hain'Andriamanitra ny manavao ny fiainantsika, hain'Andriamanitra ny manova ny fiainantsika ho fiainana lavorary koa mivaloza, mibebaha mba hiala amin'ny fahotana isika. Izany no nambaran'i Piera tamin'ireo nihaino azy, izany koa no ambara amintsika mianakavy amin'izao Alahady fahatelo amin'ny Paka izao.

Miroso tokoa ny fiainantsika ka mikendry fiainana tsaratsara kokoa isika araky ny voalaza amin'ny vakiteny faharoa androany, "*izy no nandray ny helokantsika rehetra, izy no sorona ho antsika, izy izay tsy nanota nanaiky ho fahotana mba hahatonga antsika ho zanak'Andriamanitra, izy no mpisolovava antsika amin'ny Ray, izy no mpanelanelana antsika,*" izany fanelanelanana izany dia vokatry ny fanoloran-tenany. Isika izao no Kristy mpiara-belona amin'olona ka aoka isika mba handray izany hafatr'Andriamanitra izany hahatonga antsika ho mpiara-belona amin'olona tokoa amin'ny ataontsika rehetra ka hahatonga antsika ho olom-baovao ao amin'Andriamanitra, ho mpiara-miasa amin'Andriamanitra tokoa isika, mpiara-miasa amin'I Piera.... ka zary Mpivahinin'ny Fanantenana mpamafy ny Vaovao Mahafalin'ny Paka. Vaovao satria tsy mbola nisy hatrizay ary mahafaly satria nandresy ny ratsy faratampony I Jesoa dia ny fahafatesana ka velon'aina isika jiaby ao aminy. Aoka isika mba ho mpamafy fanantenana, ho mpamafy fiadanana tokoa eo amin'ny mpiara-belona amintsika entan'ny Famindrampon'Andriamanitra tsy misy fetra.

Ry Jesoa Kristy Tompo ô, nampianarinao anay androany fa eo anivonay tokoa ianao, velona ianao ary mamelona anay ka enga anie izahay hahay hamafy izany vaovao mahafaly izany tahaka ireo apôstôly. Ampio izahay ho tena vavolombelonao tokoa, ny Fanahinao masina anie hahatonga anay ho Kristy mpiara-belona amin'ireo manodidina anay. Ampianaro izahay hahay hitarika ny olombelona eo amin'ny fahasoavanao mba ho oloaraiky aminao anie izahay, ampio izahay mba hiroso lalindalina amin'ny fandalinana ny finoana ka ho vonona hamafy fanantenana sy fiadanana tokoa anie izahay rehetra fa indrindra ho tonga EOY mifampitsimbina sy mifanasoa mikatsaka ny soa iombonana ka ho tena génération mpanorina Fianakaviamben'Andriamanitra, Fratelli Tutti, Olo Araiky Isika Jiaby. Masina Maria

Reny, Renin'ny Famindram-po ianao ka ampianaro izahay hahay hamboly famindram-po sy fifamelan-keloka. Md Josefa Ray Mpiaron'ny Eglizy Erantany ianao, tantano ny dianay ho tafita amin'ny fiainana mandrakizay. Ankininay mandrakariva amin'ny Famindram-ponao ry Ray ny Papa François ka hiadam-pinaritra ao Aminao miaraka amin'ny Olomasina sy Olontsambatra.. Amen

Mompera Arseveka Benjamin Ramaroson